

MANHAJ SYAIKH AL-ISLAM IBNU TAIMIYYAH DALAM AQIDAH

Oleh:

*Dr. Ahmad Najib Bin Abdullah**

Abstrak

Antara tokoh-tokoh terkemuka usuluddin yang banyak memberi sumbangan dalam menjelaskan persoalan-persoalan aqidah sekaligus mempertahankan kesucian Islam ialah Ibnu Taimiyyah yang lebih terkenal dengan gelaran ilmuwan besar 'Syaikh al-Islam'. Artikel ini akan mengupas secara fokus tentang manhaj aqidah Ibnu Taimiyyah yang menjadi panduan masyarakat Islam hari ini.

Muqaddimah

Perbincangan ilmiah berkaitan persoalan-persoalan agama amat penting, apatah lagi jika ia menyentuh perkara aqidah yang merupakan perkara asas dalam agama. Kehidupan beragama adalah bertunjangkan dasar kepercayaan dan pegangan aqidah di mana kehidupan seseorang itu dibina, dibentuk dan dipengaruhi oleh pegangan aqidahnya. Baik buruk, mulia dan hina seseorang di sisi Allah Ta'ala merujuk kepada aqidah keimanannya.

Umat Islam di setiap ketika harus dipekakan dengan perbincangan mengenai aqidah yang bermatlamatkan untuk mengumpul kekuatan

* Pensyarah Kanan Di Akademi Pengajian Islam Universiti Malaya, Nilam Puri, Kota Bharu, Kelantan.

bagi memantapkan keimanan dan mempertingkatkan ketaqwaan di samping membuat semakan jujur untuk diri sendiri dan umat seluruhnya demi mencari dan menerima kebenaran.

Sebagaimana bidang tafsir yang kaya dengan para mufasssirin, bidang hadith yang kaya dengan para muhaddithin, bidang feqah yang kaya dengan para fuqaha' dan bidang-bidang lain beserta para ulama'nya, bidang aqidah juga tersohor dengan tokoh-tokoh ulama' Usuluddinnya.

Ketokohan ilmu Ibnu Taimiyyah atau nama penuhnya Taqiyyuddin Ahmad bin Abdul Halim, diakui oleh ulama' terbilang dari pelbagai aliran dan bidang. Antaranya ialah Ibnu Sayyid al-Nas al-Syafi'ii (meninggal dunia 734 H), Ibnu Daqiq al-'Eid al-Malikiyy al-Syafi'ii (meninggal dunia 702 H), Ibnu al-Wardiyy al-Syafi'ii (meninggal dunia 749), Abu Hayyan al-Nahwiyy (meninggal dunia 745 H), Ibnu al-Qayyim al-Hanbaliyy (meninggal dunia 751 H), Ibnu al-Zamlakaniyy al-Syafi'ii (meninggal dunia 727 H), al-Hafiz al-Dhahabiyy (meninggal dunia 748 H), al-Hafiz al-Mizziyy al-Syafi'ii (meninggal dunia 742 H), al-Barzaliyy (meninggal dunia 738 H), al-Syaikh al-Subkiyy al-Syafi'ii (meninggal dunia 777 H) dan lain-lain¹.

Aqidah Syaikh Al-Islam Ibnu Taimiyyah

Beliau berpegang dengan aqidah ahlu al-Sunnah wa al-Jama'ah yang berdasarkan pegangan para sahabat, tabi'iiin dan tabi' tabi'iiin. Aqidah inilah yang diperjuangkan oleh pimpinan ulama' hadith, jumhur fuqaha' dan ahli sufi (pembawa tasawwuf maqbul) seperti pegangan Imam Malik, al-Thauriyy, al-Auza'iiyy, Hammad bin Zaid, Imam al-Syafi'ii, Imam Ahmad bin Hanbal dan lain-lain termasuk ulama' muhaqqiqin dari ahli kalam².

Manhaj Syaikh al-Islam Ibnu Taimiyyah Dalam Aqidah

Setakat rujukan dan pembacaan penulis, belum diperolehi sebuah kitab yang ditulis dalam bentuk yang khusus dan lengkap (dalam bahasa Arab dan Melayu) mengenai manhaj Syaikh Al-Islam Ibnu Taimiyyah dalam bidang aqidah. Namun begitu penulis berani meletakkan keyakinan yang tinggi kemungkinan sudah wujud tulisan berkaitan menerusi kajian-kajian ilmiah di peringkat sarjana dan doktor falsafah di universiti-universiti Arab Saudi terutamanya di tiga buah universiti Islam terkemuka; Universiti Islam Madinah³, Universiti Ummu al-Qura di Makkah dan Universiti Imam Muhammad bin Sa'ud di Riyadh.

Untuk mengetahui sedikit sebanyak pandangan atau pendapat Syaikh Al-Islam Ibnu Taimiyyah berkaitan beberapa persoalan aqidah terdapat beberapa buah buku yang boleh kita baca dan kaji, antaranya; *al-Imam Ibnu Taimiyyah Wa Mauqifuhu Min Qadhiyyah al-Ta'wil* karangan al-Syaikh Muhammad al-Sayyid al-Julainid⁴ dan *Ba'ith al-Nahdhah al-Islamiyyah Ibnu Taimiyyah al-Salafiyy: Naqduhu Li Masalik al-Mutakallimin Wa al-Falasifah Fi al-Ilaahiyyat* karangan Prof. Muhammad Khalil Haras. Kedua-dua buah buku ini sedikit sebanyak boleh membantu kita mengenal dan memahami aqidah dan manhaj Ibnu Taimiyyah serta cara memperjuangkannya.

Bukanlah satu kerja yang mudah untuk mengetahui manhaj seseorang tokoh secara mendalam dalam apa jua bidang yang diceburi. Ia memerlukan kajian mendalam yang merangkumi setiap pandangan dan sikap yang diperolehi melalui tulisan atau karya-karya yang dihasilkan. Perolehan ini sekiranya disokong dengan maklumat-maklumat tambahan dari ulama' muktabar dan pengkaji-pengkaji yang jujur boleh membantu memperlengkapkan kajian manhaj berkenaan.

Untuk menemukan manhaj aqidah yang dipegangi oleh Ibnu Taimiyyah, kajian dan penelitian perlu dilakukan ke atas segala persoalan

aqidah yang beliau bincangkan, dan jawapan-jawapan beliau kepada soalan atau masalah yang dikemukakan kepadanya yang semua itu biasanya termuat dalam karya-karya peninggalannya.

Sebahagian besar karya-karya Syaikh al-Islam Ibnu Taimiyyah dalam bidang aqidah seperti berikut⁵:

- 01- *Al-Iman*
- 02- *Al-Istiqamah*
- 03- *Iqtidha' al-Sirat al-Mustaqim*
- 04- *Al-Furqan Baina Auliyya' al-Rahman Wa Auliyya' al-Syaitan*
- 05- *Syarh al-Asbahaniyyah*
- 06- *Al-Risalah al-Hamawiyyah*
- 07- *Al-Risalah al-Tadmuriyyah*
- 08- *Al-Risalah al-Wasitiyyah*
- 09- *Risalah al-Ihtijaj Bi al-Qadha' Wa al-Qadr*
- 10- *Qa'idah Jalilah Fi al-Tawassul Wa al-Wasilah*
- 11- *Minhaj al-Sunnah al-Nabawiyyah Fi Naqdhi Kalam al-Syi'ah Wa al-Qadariyyah*
- 12- *Risalah Maratib al-Iradah*
- 13- *Al-Rasa'il al-Ba'labakiyyah wa al-Kalaniyyah wa al-Baghdadiyyah wa al-Azhariyyah*
- 14- *Ma'arij al-Wusul*
- 15- *Naqdhu al-Mantiq*
- 16- *Al-Raddu 'ala al-Mantiqiyyin*
- 17- *Muwafaqah Sohih al-Manqul Li Sorih al-Ma'qul*
- 18- *Al-Jawab al-Sohih Li Man Baddala Din al-Masih*
- 19- *Majmu' al-Fatawa (Dari jilid 1 hingga jilid 8 membincangkan soal aqidah).*

Rumusan aqidah Syaikh al-Islam Ibnu Taimiyyah dapat diperoleh melalui ungkapan bait-bait syair beliau yang terkenal dengan al-Lamiyyah:⁶

يا سائلي عن مذهبي وعقيدتي	رزق الهدى من الهداية يسأل
اسمع كلام محقق في قوله	لا ينثني عنه ولا يتبدّل
حب الصحابة كلهم لي مذهب	ومودة القربى بها أتوسل
وأقول في القرآن ما جاءت به	آياته فهو القديم المنزل
وأقول : قال الله جلّ جلاله	والمصطفى الهادي ولا أتأول
وجميع آيات الصفات أمرها	حقا كما نقل الطراز الأول
وأرد عهدها إلى نقالها	وأصونها عن كل ما يتخيل
قبحا لمن نبذ القرآن وراءه	وإذا استدل يقول : قال الأخطل
والمؤمنون يرون حقا ربهم	وإلى السماء بغير كيف ينزل
وأقر بالميزان والحوض الذي	أرجو بأنني منه ريا أنهل
وكذا الصراط يمد فوق جهنم	فمسلم ناج وآخر مهمل
والنار يصلها الشقي بحكمة	وكذا التقى إلى الجنان سيدخل
ولكل حي عاقل في قبره	عمل يقارنه هناك ويسأل
هذا اعتقاد الشافعي ومالك	وأبي حنيفة ثم أحمد ينقل
فإن اتبعت سبيلهم فموفق	وإن ابتدعت فما عليك معول

perolehi
an al-

يا

اس

ح

و

و

و

و

قب

و

و

و

و

و

هـ

ف

Maksudnya:

Wahai saudara yang bertanya tentang mazhab dan aqidahku
Orang yang memohon petunjuk tentu diberikan petunjuk
Dengarlah kata-kata orang yang benar-benar melakukannya
Tidak ia berpaling dan tidak pula berubah sikap
Mencintai para sahabat kesemuanya adalah mazhabku
Kasih kepada para qurba, ku jadikannya tawassulku
Aku berkata sepertimana al-Quran berbicara
Menerusi ayat-ayatnya, ia qadim dan munazzal,
Aku berkata : Allah Jalla Jalaluhu berfirman
Dan Nabi terpilih lagi pembawa petunjuk bersabda, tidak ku
takwil
Kesemua ayat-ayat sifat, aku terima benar
Sebagaimana dinaqalkan generasi awalan
Aku sandarkan ia kepada para pelapornya
Dan ku jaga dari sesuatu yang boleh dikhayalkan
Celakalah orang yang melempar Al-Quran ke belakangnya
Apabila ia berhujjah, katanya: Berkata al-Akhtal
Orang beriman benar-benar dapat memandang Tuhan mereka
TurunNya ke langit tanpa kaifiyyat
Aku beriman wujudnya neraca mizan dan kolam
Ku harap dapat meminum airnya sepuas-puasnya
Demikian sirat yang terbentang di atas jahannam
Orang beriman berjaya merentasinya, selainnya dibiarkan
Neraka diasak orang-orang celaka
Orang bertaqwa pula ke Syurga ia masuk
Setiap orang yang hidup lagi berakal, di dalam qubur
Amalan menemaninya, lalu disoal
Inilah aqidah pegangan al-Syafi'iyy dan Malik
Abu Hanifah dan Ahmad yang dinaqal
Jika engkau mengikut jalan mereka, maka mendapat taufiqulah,
Dan sekiranya engkau melakukan bid'ah, engkau nantinya
ketiadaan tempat bergantung

Dari apa yang dinyatakan di atas, bolehlah dijelaskan bahawa manhaj Syaikh al-Islam Ibnu Taimiyyah dalam aqidah dapat disenaraikan seperti berikut:

1. Berpegang Kepada Manhaj Dan Kehendak al-Quran Dan al-Sunnah al-Sahihah

Sejak kecil lagi, beliau sudahpun khatam dan hafaz al-Qur'an dan dengan bekalan al-Qur'an beliau mampu merujuk kepada ayat-ayatnya sewaktu berhujjah, beristidlal dan mengeluarkan fatwa⁷.

Sewaktu berucap di atas minbar, terserlah kehebatan ilmu tafsir, hadith, feqah dan bahasa Arab yang dimiliki beliau seolah-olah kesemua ilmu tersebut sedia terbentang di hadapan beliau untuk beliau kutip apa yang diperlukan⁸.

Al-Hafiz al-Mizzi r.a menyatakan:

"Saya tidak menjumpai orang yang lebih alim dan berpegang kepada Kitab Allah dan Sunnah RasulNya melebihi beliau (Syaikh Al-Islam Ibnu Taimiyyah)⁹ "

Al-Hafiz al-Dhahabiyy r.a pula menyebut keilmuan Syaikh al-Islam Ibnu Taimiyyah tentang bidang hadith dan mustalah al-hadith serta ilmu rijal al-hadith yang tidak dapat ditandingi sesiapa ditambah hafazannya yang cukup luar biasa terhadap hadith-hadith dalam al-kutub al-sittah dan musnad¹⁰.

Apabila beliau ditanya tentang pandangannya mengenai ayat-ayat Al-Quran dan hadith-hadith yang berhubung sifat-sifat Allah s.w.t, beliau menjawab :

"الحمد لله رب العالمين ، قولنا فيها ما قال الله ورسوله صلى الله عليه وسلم والسابقون الأولون من المهاجرين والأنصار والذين اتبعوهم بإحسان ، وما قاله أئمة الهدى بعد هؤلاء الذين أجمع المسلمون على هدايتهم ودرائتهم ، وهذا هو الواجب على جميع الخلق في هذا الباب وغيره" ¹¹.

"Alhamdulillah Tuhan sekalian alam, pandangan kami terhadap masalah tersebut sepertimana yang telah difirmankan oleh Allah dan disabdakan oleh RasulNya serta golongan awalan dari kalangan orang-orang muhajirin dan ansar, juga orang-orang yang mengikuti mereka dengan ihsan, serta apa yang diperkatakan oleh ulama terpimpin sesudah mereka yang telah disepakati keberolehan petunjuk dan keilmuan mereka oleh kaum muslimin. Inilah yang wajib dipegangi oleh setiap orang dalam masalah ini dan lain-lainnya".

Manhaj inilah juga yang dipakai oleh Imam-imam Empat; Abu Hanifah, Malik, al-Syafi'ii dan Ahmad¹².

Imam al-Syafi'ii ada menegaskan¹³:

"نثبت هذه الصفات التي جاء بها القرآن ووردت بها السنة وننفي التشبيه عنه كما نفى عن نفسه فقال (ليس كمثله شيء...)"

"Kami mengisbatkan sifat-sifat Allah yang disebut oleh al-Quran dan al-Sunnah dan kami menafikan tasybih terhadap sifat-sifatNya sebagaimana Dia telah menafikannya, sebagaimana Allah berfirman (dengan maksudnya): Tiada sesuatu yang menyerupaiNya..."

Dan katanya lagi¹⁴:

" الحمد لله ... الذي هو كما وصف به نفسه وفوق ما يصفه به خلقه "

"Alhamdulillah, sebagaimana Dia telah menyifatkan diriNya, melebihi apa yang disifatkan makhlukNya terhadapNya".

Manhaj ini jugalah yang telah dipegang oleh beberapa tokoh aqidah dan ilmu kalam terdahulu seperti Abu Hasan al-Asy'ariyy dalam kitab al-Ibanah, al-Ghazali dalam Ijam al-'awam 'an 'ilmi al-Kalam dan al-Fakhruraziyy dalam Aqdam al-Lazzat. Imam al-Fakhruraziyy ada menegaskan¹⁵:

"لقد تأملت الطرق الكلامية والمناهج الفلسفية فما رأيتها تشفي عليا ، ولا تروي غليلا ، ورأيت أقرب الطرق طريقة القرآن ، أقرأ في الإثبات (الرحمن على العرش استوى)¹⁶ (إليه يصعد الكلم الطيب)¹⁷ ، وأقرأ في النفي (ليس كمثله شيء)¹⁸ (ولا يحيطون به علما)¹⁹ ومن جرب مثل تجربتي عرف مثل معرفتي " ²⁰

"Demi sesungguhnya, saya telah memerhatikan manhaj ahli kalam dan juga manhaj ahli falsafah, maka saya tidak mendapati ia boleh menyembuhkan orang yang sakit dan tidak pula boleh menghilangkan dahaga. Saya mendapati sedekat-dekat (sebaik-sebaik) manhaj adalah manhaj Al-Quran. Saya baca tentang ayat mengistbatkan sifat Allah (الرحمن على العرش استوى) (إليه يصعد الكلم الطيب) dan saya baca tentang ayat yang menafikan (ليس كمثله شيء) (ولا يحيطون به علما). Sesiapa yang mencuba menjalani manhaj saya ini tentu ia akan beroleh ilmu ma'rifat seperti yang saya perolehi".

Dalam merujuk kepada Al-Sunnah, Ibnu Taimiyyah menekankan pentingnya berpegang kepada hadith-hadith sahih yang diperakui ulama' hadith di mana beliau menyatakan di antara punca kesesatan beberapa golongan manusia adalah disebabkan mereka berpegang dengan hadith-hadith yang palsu. Justeru perlu dikenal pasti hadith yang sahih dari hadith yang palsu²¹.

2. Beriltizam Dengan Lafaz-Lafaz Dan Istilah Al-Quran Dan Al-Sunnah

Untuk mengelak dari kemungkinan berlaku kekeliruan dan salah faham dalam menjelaskan pengertian nas-nas yang berkaitan dengan aqidah di dalam Al-Quran dan Al-Sunnah, Ibnu Taimiyyah mengguna pakai istilah serta lafaz-lafaz yang di bawa oleh kedua-dua sumber besar ini. Penggunaan lafaz-lafaz yang tidak bersumberkan nas syara' dalam aqidah boleh mengundang banyak masalah dan banyak memberi ruang kepada orang-orang yang berkepentingan dan mereka yang sesat untuk membuat andaian dan tafsiran sendiri²².

Beliau menegaskan:

"فالواجب أن ينظر في هذا الباب، فما أثبتته الله ورسوله أثبتناه، وما نفاه الله ورسوله نفيناه، والألفاظ التي ورد بها النص يعتصم بها في الإثبات والنفي .."

"Wajib diteliti dalam masalah ini, apa yang diistbatkan oleh Allah dan RasulNya kita istbatkan, apa yang dinafikan kita nafikan di mana lafaz-lafaz yang terdapat dalam nas hendaklah dipegangi baik dalam pengistbatan sifat atau penafian" ²³.

3. Mendahulukan al-Naql (al-Qur'an dan al-Sunnah) dari al-Aql

Ibnu Taimiyyah berpandangan wujud keserasian antara *sohik al-ma'qul* dan *sohik al-manqul* di mana akal yang benar tidak akan bercanggah dengan nas-nas yang *sohik*. Walaubagaimana pun, nas syara' diutamakan dalam membincangkan permasalahan aqidah. Kerana itu beliau menulis kitabnya *Muwafaqah Sohik al-Manqul Li Sohik al-Ma'qul*.

Dengan manhaj ini, beliau menolak manhaj ahli kalam yang meletakkan akal mengatasi segala-galanya. Mengutamakan naqal tidak bermakna menolak peranan akal sama sekali. Akal berfungsi untuk menerima dan mengikut naqal. Naqal ibarat imam manakala akal adalah seorang makmum.

4. Merujuk Kepada Pandangan Dan fahaman Para Ulama' Salaf

Dalam menentukan perkara-perkara berkaitan aqidah, selain merujuk kepada dua sumber utama Al-Quran dan al-Hadith, Ibnu Taimiyyah merujuk juga kepada pandangan dan pendapat para sahabat dan tabi'in yang mana mereka merupakan saf ulama' terawal bagi umat ini. Mereka lebih 'alim berbanding generasi yang menyusuli mereka.

Menurut Ibnu Taimiyyah, para sahabat adalah bersepakat dalam perkara-perkara usuluddin, mereka tidak berselisih pendapat tentangnya sebagaimana berlaku kepada golongan selepas mereka, tidak berlaku di kalangan mereka perlakuan bid'ah dan menurut hawa nafsu (menyeleweng)²⁴.

Dalam memahami ayat-ayat Sifat sebagai contoh, Ibnu Taimiyyah mengemukakan sikap dan pandangan Imam Malik r.a apabila beliau ditanya bagaimana Allah beristiwa' di atas arsyNya, beliau menjawab:

-Aql

"الاستواء غير مجهول ، والكيف غير معقول ، والإيمان به واجب ، والسؤال عنه بدعة " ²⁵

"Istiwa' itu sedia termaklum, bagaimana caranya tidak pula dapat dicapai akal, sementara beriman thabitnya sifat istiwa' itu adalah wajib dan bertanya tentangnya merupakan satu bid'ah".

Perkara yang sama pernah dinyatakan oleh guru Imam Malik iaitu Rabi'ah di mana beliau berkata: ²⁶

"الاستواء معلوم ، والكيف مجهول ، ومن الله البيان ، وعلى الرسول البلاغ ، وعلينا الإيمان "

"Istiwa' itu termaklum, kafiyyatnya tidak dicapai akal, Allah jua yang menerangkan, Rasul pula menyampaikannya dan kita diwajibkan beriman kepadanya".

Demikian juga beliau menyebut sikap dan pandangan Imam al-Syaf'ii, Imam Muhammad bin al-Hasan, sahabat Imam Abu Hanifah dan lain-lain yang dapat dirumuskan betapa Ibnu Taimiyyah bersandar kuat kepada pandangan ulama'-ulama' tersebut²⁷.

Di dalam kitab al-Fatwa al-Hamawiyyah al-Kubra, Ibnu Taimiyyah menyenaraikan puluhan kitab karangan ulama' yang memuatkan pandangan-pandangan Salaf dalam aqidah, antaranya: ²⁸

1. Al-Sunnah – karangan Abu Zar al-Harawiyy
2. Al-Sunnah - karangan al-Tabaraniyy
3. Al-Sunnah - karangan al-Khallal
4. Al-Sunnah – karangan al-Lalakaii
5. Al-Sunnah – karangan Ibnu Abi 'Asim
6. Al-Tauhid – karangan Ibnu Khuzaimah
7. Al-Ibanah – karangan Ibnu Battah

5. **Membasmi Sebarang Punca Syirik Yang Bercanggah Dengan Aqidah**

Ibnu Taimiyyah mengambil berat dalam setiap perkara yang boleh membawa kepada kerosakan aqidah, kerana itu beliau banyak mendedahkan kebatilan beberapa amalan syirik, antaranya menyembah kubur para auliya' atau menganggap kubur seseorang itu boleh memenuhi tuntutan orang yang membuat permohonan atau doa, mendewakan sebahagian orang-orang solih yang telah mati sehingga ke peringkat mereka memiliki khususiat Tuhan.

Al-Hafiz Ibnu Kathir r.a. ada menyebut bagaimana Ibnu Taimiyyah telah pergi ke Masjid al-Tarikh dan mengarahkan sahabat-sahabatnya membuang batu besar yang terdapat di sana iaitu di Sungai Qalut di mana ia dizarahi dan dilakukan pembayaran nazar di sana, lalu Ibnu Taimiyyah membuang batu tersebut dan mengelak orang ramai dari terfitnah dengannya.²⁹

Apabila ditanya oleh Al-Hafiz Abu Hafs al-Bazzar sebab-sebab kenapa Ibnu Taimiyyah banyak menulis dalam bidang usuluddin/ aqidah, beliau menjelaskan betapa niat buruk aliran puak-puak yang menyeleweng untuk merosakkan syari'at Islam yang suci. Puak-puak itu seperti golongan ahli falsafah, *batiniyyah*, *dahriyyah*, *qadariyyah*, *Nusairiyyah*, *Jahmiyyah* dan banyak lagi. Justeru perlu ditolak ajaran dan syubhah atau kekeliruan yang ditimbulkan supaya terdedah kepalsuan dan kesesatan mereka demi menjaga kesucian Islam³⁰.

6. **Tidak Mengkafirkan Orang Yang Salah Dalam Ijtihadnya Dengan Mentakwil Nas Sedang Qasad dan Niatnya Adalah Mengikut Rasulullah s.a.w**

Ibnu Taimiyyah membuat pengkelasan yang adil dalam menilai kedudukan orang yang menyalahi Al-Quran dan Al-Sunnah. Ada yang

dikelaskan sebagai kafir, ada yang fasiq dan ketiganya sekadar 'asiyy (pelaku maksiat) kecuali ia adalah seorang yang beriman dan ahli ijtihad yang tersalah dalam ijtihadnya, maka ia diberi pahala di atas usaha ijtihadnya itu dan diampunkan kesalahannya. Demikian juga sekiranya seorang itu tidak sampai kepadanya ilmu yang boleh dijadikan hujjah kerana Allah berfirman:

وَمَا كُنَّا مُعَذِّبِينَ حَتَّى تَبْعَثَ رَسُولًا

"Dan tidaklah Kami (Allah) bertindak mengenakan azab (ke atas sesiapa) sehingga Kami terlebih dahulu mengutuskan rasul"

Al-Isra' (17): 15

Adapun sekiranya sudah terbukti jelas hujjah yang terdapat dalam Al-Quran dan Al-Sunnah, lalu dicanggahnya maka ia akan dihukum berdasarkan percanggahannya itu samada dibunuh atau dikenakan tindakan-tindakan lain.³¹

Menjelaskan ketelitian Ibnu Taimiyyah dalam menentukan kedudukan aliran-aliran yang berbeza seperti 'Asya'irah, Muktazilah dan Rafidhah, Prof. Muhammad Khalil Haras menyebut bahawa Ibnu Taimiyyah meletakkan kayu pengukur yang cukup baik, iaitu kesemua aliran berkenaan tidaklah setaraf hukumnya, ada yang lebih mendekati al-Qur'an dan al-Sunnah seperti 'Asya'irah di mana menurut Ibnu Taimiyyah mereka adalah terlebih baik daripada aliran Muktazilah dan lain-lain kerana mereka menepati ajaran Salaf dalam banyak permasalahan sebagaimana ternyata usaha mereka memerangi fahaman Muktazilah, Jahmiyyah dan Rafidhah, di tambah dengan sikap mereka mengagungkan al-Hadith dan mazhab jama'ah.³²

7. Menyanggah Kesesatan Aliran Yang Menyeleweng Dengan Merujuk Sumber Asal Aliran Berkaitan

Tugas seorang tokoh aqidah yang benar tidak sekadar menghayati aqidah untuk diri sendiri, sebaliknya mengambil tahu permasalahan aqidah umat sejagat. Tugas menyanggah dan menolak aliran yang menyeleweng bukan satu kerja yang mudah.

Menyedari hakikat ini, untuk berdepan dengan pelbagai golongan dan aliran yang berkembang biak di waktu itu, seperti aliran falsafah yang terpengaruh dengan falsafah Yunan kuno dan aliran mantiq yang bersumberkan pemikiran Aristotle yang di anggap Ibnu Taimiyyah golongan yang menyimpang, beliau terlebih dahulu membaca dan mengkaji kitab-kitab asal karangan mereka. Sesudah betul-betul memahami kandungan kitab-kitab berkenaan, barulah beliau mengkritik pandangan mereka dengan cara yang *ilmiyyah*, berserta hujjah-hujjah naql dan *'aql*.

Ibnu Taimiyyah juga banyak membaca tulisan-tulisan aliran Muktazilah dan memahami pegangan mereka. Beliau juga membaca tulisan-tulisan al-'Asy'ariyy, al-Baqillaniyy, Imam al-Haramain, al-Ghazali, al-Razi, al-Aamidiyy dan lain-lain.

Kefahamannya tentang hakikat Syi'ah dan akidah mereka yang menyeleweng, mendorong beliau menulis jawapan yang cukup ilmiah terhadap aliran tersebut menerusi kitabnya *'Minhaj al-Sunnah al-Nabawiyyah Fi Naqdhi Kalam al-Syi'ah Wa al-Qadariyyah'*.

Beliau juga menulis kitab *'Al-Jawab al-Sohih Li Man Baddala Din al-Masih'* bagi menyanggah kesesatan yang dibawa oleh agama Nasrani.

Benarlah kata-kata al-Dhahabiyy yang menyebut, penguasaan ilmu yang tinggi yang dimiliki oleh Ibnu Taimiyyah di dalam pelbagai

aliran pemikiran ilmu kalam dan penguasaan beliau berkaitan agama adalah tidak ada tolok bandingnya.³³

8. Bersikap Adil Dan Sederhana Dalam Menilai Aliran-Aliran Menyeleweng (*al-mubtadi'ah*)

Berdasarkan kajian terhadap tulisan-tulisan Syaikh al-Islam Ibnu Taimiyyah berkenaan sikapnya dalam berinteraksi dengan aliran-aliran yang menyeleweng terserlah pandangan dan sikapnya yang cukup sederhana dan adil di mana beliau tidaklah menghukum seseorang melainkan dengan asas-asas pertimbangan yang amat teliti.

Penulis amat tertarik dengan tulisan Dr. Ahmad bin Abdul Aziz al-Hulaibiyy di mana beliau telah menyenaraikan dua belas asas pertimbangan yang diguna pakai Ibnu Taimiyyah dalam berhadapan dengan aliran *al-mubtadi'ah*. Ada baiknya diperturunkan di sini asas-asas tersebut.³⁴

1. Diberi keuzuran (kemaafan) kepada orang-orang yang solih lagi mulia dalam perkara-perkara bid'ah yang dilakukan melalui ijihad di mana di kata-kata mereka itu harus di fahami dengan sebaik-baiknya.
2. Tidak boleh menghukum berdosa seorang mujtahid sekiranya ia melakukan kesalahan dalam masalah-masalah usul atau furu' lebih-lebih lagi menghukum kafir atau fasiq.
3. Di beri kemaafan kepada pelaku bid'ah tidak bererti mengiyakan bid'ah yang dilakukan dan tidak pula bermaksud harus mencontohinya. Sebaliknya wajib diingkarkan perkara itu dengan adab yang baik
4. Tidak segera menghukum seseorang yang terlibat melakukan bid'ah bahawa ia tergolong dalam golongan ahli bid'ah dan sesat di mana ia tidak boleh dimusuhi dengan sebab perlakuannya itu

- kecuali jika bid'ah itu adalah bid'ah yang diketahui umum dan berat kesalahannya di sisi ulama' yang alim tentang al-Sunnah
5. Tidak boleh dihukum pasti rosak aqidah orang yang menyalahi dalam aqidah atau lainnya, juga kepada puak-puak tertentu bahawa mereka tergolong dari puak-puak tujuh puluh dua yang sesat kecuali apabila kesalahannya itu berat.
 6. Mengenal pasti pelaku perkara yang membawa kekufuran atau kefasiqan sebelum dihukum kafir atau fasiq. Itu pun sesudah dikemukakan hujjah terhadapnya.
 7. Berusaha memesrakan hati dan menyatukan pandangan, mendamaikan perseteruan antara dua pihak dan berhati-hati dalam perselisihan pendapat dalam masalah aqidah furu' dan amali agar tidak membawa terurai ikatan ukhuwwah sesama orang-orang Islam.
 8. Berlaku adil dalam menyebut pujian dan celaan golongan mu'tadi'ah, menerima apa yang benar dan menolak apa yang salah.
 9. Mengambil kira syarat-syarat *amar ma'ruf nahi munkar* dalam menyuruh berpegang kepada al-Sunnah dan mencegah bid'ah serta menyenaraikan keutamaan.
 10. Dikenakan hukuman ke atas penyeru kepada bid'ah dengan cara yang boleh menginsafi dan memperbaiki akhlaknya kerana kesan buruk perlakuannya boleh merebak kepada orang lain.
 11. Sah solat di belakang pelaku bid'ah apabila tidak berupaya solat di belakang pengikut al-sunnah. Sekiranya berupaya, hukum solat di belakang mu'tadi' itu diperselisihi ulama'.
 12. Taubat penyeru bid'ah adalah diterima.

Kesimpulan

Dari penjelasan yang panjang lebar di atas, bolehlah disimpulkan bahawa aqidah pegangan Ibnu Taimiyyah adalah aqidah Salaf yang

berasaskan petunjuk al-Quran, al-Sunnah, pandangan para sahabat, tabi'iiin dan tabi' tabi'iiin. Manhaj aqidahnya cukup jelas. Ketokohan beliau dalam bidang aqidah ternyata hebat kerana penguasaan ilmu beliau bukan setakat memahami nas-nas al-Quran dan al-Hadith, malah beliau berpengetahuan tinggi dalam bidang-bidang agama yang lain, ditambah kemahirannya dalam ilmu kalam, mantiq dan falsafah di mana kesemua gabungan ini membentuk syahsiah Ibnu Taimiyyah sebagai Syaikh al-Islam, gelaran ternama dan diperakui keilmuannya. Dengan ini benarlah pandangan Prof. Muhammad Khalil Haras yang berkata bahawa Ibnu Taimiyyah bukan setakat mujaddid kepada aliran Salaf bahkan beliau banyak menyumbang kepada menjawab permasalahan-permasalahan ilmu kalam seperti masalah jauhar, ardh, jihah, jisim dan sebagainya dengan hujjah dan dalil yang meyakinkan bagi mempertahankan aqidah Salaf.³⁵

NOTA HUJUNG

- ¹ Mar'ii bin Yusuf al-Hanbaliyy (1985), *Al-Syahadah al-Zakiyyah Fi Thana' al-A'immah 'Ala Ibni Taimiyyah*, Dar al-Furqan.
- ² Majmu' al- Fatawa, 12/ 471, dan lihat: Ahmad bin Abdul Aziz al-Hulaibi (1997), *Usul al-Hukm 'ala al-Mubtadi'ah 'Inda Syaikh al-Islam Ibnu Taimiyyah*, Qatar, h. 51-54.
- ³ Sebuah tesis berjudul "*Manhaj Syaikh Al-Islam Ibnu Taimiyyah Fi Ta'sil al-Aqidah al-Islamiyyah*" dikemukakan oleh Jabran bin Ahmad Salleh, penuntut Saudi di Universiti Islam Madinah untuk meraih gelaran Doktor Falsafah pada 18.6.1407H.
- ⁴ Buku ini diterbitkan oleh Majma' al-Buhuth al-Islamiyyah, Universiti al-Azhar, Kaherah pada tahun 1976.
- ⁵ Ibrahim Muhammad al-'Aliyy (2000), *Syaikh al-Islam Ahmad bin Taimiyyah Rajul al-Islah Wa al-Da'wah*, Damsyiq: Dar al-Qalam, h. 501-502.
- ⁶ Lihat: Said Abdul Aziz al-Syibilliy, *Al-Aqidah al-Salafiyyah*, h. 298-300, Lihat Ibrahim Muhammad al-'Aliyy, *Syaikh al-Islam Ahmad bin Taimiyyah Rajul al-Islah Wa al-Da'wah*, h. 505-506.
- ⁷ Lihat: A-Hafiz Umar bin 'Ali al-Bazzar (1976), *Al-A'lam al-'Aliyyah*, Beirut: Dar al-Kitab al-Jadid, h. 20-23, dan Ibnu Abdul Hadi, *Al-'Uqud al-Durriyyah*, h. 3.
- ⁸ Lihat : Ibnu Hajar al-'Asqalaniyy, *Al-Durar al-Kaminah*, 1/153.
- ⁹ Lihat : Ibnu Abdul Hadiyy, *Al-'Uquud al-Durriyyah*, h. 7.
- ¹⁰ *Ibid*, h. 24-25.
- ¹¹ *Al-Fatwa al-Hamawiyyah al-Kubra*, h. 4.
- ¹² Lihat: Muhammad bin Abdul Rahman Al-Khumayyis (1992), *I'tiqad al-Aimmah al-Arba'ah*, Riyadh: Dar al-'Asimah.
- ¹³ *Al-Zahabiyy, Siyar 'A'lam al-Nubala'*, 20/341.
- ¹⁴ *Al-Risalah*, Beirut: Dar al-Kutub al-'Ilmiyyah, h. 7-8.
- ¹⁵ Lihat: Yusuf Abdullah al-Qaradhawiyy (1996), *Thaqafah al-Da'iah*, h. 81.
- ¹⁶ Surah Toha: 5
- ¹⁷ Surah Fatir : 10
- ¹⁸ Surah al-Syura: 11
- ¹⁹ Surah Toha : 110
- ²⁰ *Ibid.*, h. 7.
- ²¹ *Al-Tafsir al-Kabir*, 6/414-417.

- ²² Abdullah bin Rasyid al-Hausyani (1996), *Manhaj Ibnu Taimiyyah Fi al-Dakwah*, 1/ 88-89.
- ²³ *Minhaj al-Sunnah al-Nabawiyyah*, 3/554. Lihat: Ahmad Najib Abdullah, *Al-Sifat al-Khabariyyah Baina ahli al-Sunnah wa al-Mutakallimin*, h. 16-17.
- ²⁴ *Al-Tafsir al-Kabir*, 1/157, 160.
- ²⁵ *Naqdh al-Mantiq*, h. 3.
- ²⁶ *Al-Risalah al-Tadmuriyyah*, h. 62.
- ²⁷ *Ibid.* h. 2-4.
- ²⁸ *Al-Fatwa al-Hamawiyyah al-Kubra*, h. 15.
- ²⁹ Ibnu Kathir, *Al-Bidayah Wa al-Nihayah*, 14/ 34.
- ³⁰ Lihat: Syaikh al-Islam Ahmad bin Abdul Halim, hlm. 497-498.
- ³¹ Lihat: *Al-Fatawa* 1/ 113. *Al-Istiqamah* 2/188.
- ³² Lihat: *Ibnu Taimiyyah al-Salafiyy*, h. 40.
- ³³ *Ibid.*, h. 28-29.
- ³⁴ Ahmad bin Abdul Aziz al-Hulaibi (1997), *Usul al-Hukm 'ala al-Mubtadi'ah 'Inda Syaikh al-Islam Ibni Taimiyyah*, Qatar.
- ³⁵ Lihat: *Ibnu Taimiyyah al-Salafiyy*, h. 183.